

# Da «backstage» enfin «workshop»

Ina publicaziun preschenta 100 anglicissem e lur istorgia

■ En intervals irregulars publitgescha la Secziun da terminologia da la Chanzlia federala glossaris tematics ed autras brochuras davart la terminologia. Il 2015 è cumparida ina publicaziun en tschintg linguas (tudestg, franzos, talian, rumantsch ed englais) che tracta 100 anglicissem. A moda divertenta vegn dà in sguard a l'origin da quels e mussà co che las quatter linguas svizras als integreschan en lur ambient linguistic specific. Chatta preschenta ils chapitels introductivs da la brochura.

## Pertge ina publicaziun davart ils anglicissem?

Ils ultims onns ston ins remartgar in grond augment d'anglicissem en nossas linguas, surtut er en ils texts da l'administraziun federala. Ils anglicissem designeschan savens novas realitads (anc) betg enconuscentas publicamain, na levgeschan dentant betg adina l'access als texts e cun quai la communicaziun. L'administraziun federala è obligada da respectar las linguas naziunalas, sto dentant sa drizzar a la populaziun



en ina lingua chapibla. Ella sto pia s'exprimer cun preferenza en tudestg, en franzos, en talian ed en rumantsch e betg simplamain duvrar plets esters.

La publicaziun en tschintg linguas ha pliras finamiras, numnadamain da:

proponer alternativis a l'anglicissem en las linguas naziunalas, sch'il diever permetta quai;

explitgar la polisemia cuntegnida en l'anglicissem, vul dir explitgar differenzas da senn tut tenor il context e cun quai la necessitad da proponer plirs equivalentes en las linguas naziunalas (p.ex. *timing*, *deal*, *cash*);

preschentar ils pseudoanglicissem creads da pajais betg anglofons che na vegnan betg duvrads en englais e na vengnan pia savens er betg chapids (u chapids falladamain) da personas da lingua englaisa (p.ex. *beamer*, *smoking*).

La finamira da questa publicaziun èsi da divertir las lecturas ed ils lecturs e d'als render a medem temp conscients da las ritgez da lur atgna lingua e da la lingua dals auters.

## Cuntegn e structura da la publicaziun

Intgins dals anglicissem fan part da la lingua da mintgadi, auters èn plitost terms technics ch'appartegnan a diversas domenas sco per exempel a l'informatica, a l'economia u al sector da transport. Els èn vegnids elegids tenor lur impurtanza linguistica, istorica u terminologica ubain tenor la frequenza dal diever; relevant è er stà il concept pluriling da la publicaziun. In anglicissem po numnadamain exister en tuttas quatter linguas naziunalas (p.ex.



Cuverta da la brochura.

*coach*), el po magari cumparair mo en ina lingua (p.ex. *free press* en talian) u perfin esser ina creaziun che n'exista betg en englais en quel senn (p.ex. *smoking*).

Las endataziuns vegnan tractadas en successiun alfabetica ed han tuttas la medema structura: a l'anglicissem suondan ina definiziun ed explicaziun e remartgas en englais, tudestg, franzos, talian e rumantsch, cumpletadas cun eventuals equivalentes en las quatter linguas naziunalas. En moda e maniera narrativa vegn preschenta l'istorgia da l'anglicissem e ses diever che po sa distinguer grondamain d'ina lingua a l'autra. Simbols grafics inditgeschan il champ d'applicaziun (consum, societad, informatica, communicaziun etc.).

La publicaziun vul er mussar explicitamain, co ch'ils anglicissem vegnan tractads en moda differenta en las diversas linguas. Perquai po variar la descripziun dals plets emprestads d'ina lingua a l'autra. Las endataziuns èn vegnidas scrites aposta en mintga lingua e betg transladas d'ina lingua en in'autra. Uschia vegn descrit il diever d'in anglicissem or da la percepziun d'ina singula lingua e da sia cuminanza linguistica.

Tut ils anglicissem preschentads en questa publicaziun chat'ins en la banca da datas federala Termdat ([www.termdat.ch](http://www.termdat.ch)) che cuntegna er infurmaziuns supplementaras, cunzunt indicaziuns davart las funtaunas duvradas. Per questa publicaziun èn vegnidas reformuladas las definiziuns e las remartgas.

## Anglicissem: in fenomen universal cun diversas percepziuns

La preschientscha d'anglicissem en la lingua è ina realitad per uschè dir universal. En l'Europa exista ella en tut las linguas, vegn dentant percepida, validada e duvrada differentamain, tut tenor il pajais e la cultura.

Tschertas linguas s'actualiseschan cun integrar ils terms englais sco tals en il vocabulari existent. Quai è per gronda part

il cas tar la lingua taliana. Il tudestg per cunter assimilescha ils terms englais il pli cun scriver il substantiv en maiuscla (p.ex. *Cloud Computing*) u cun agiuntar il suffix -en per in verb (p.ex. *download-en*). Il franzos sa stenta, per part influenzà dal Québec, da chattar equivalentes franzos. En Svizra, il pajais multiling, nua che bunamain tut vegn translata en pliras linguas, profita l'anglicissem en general d'ina gronda toleranza, cunquai ch'el gida en blers cas (presumptivamain) ad evitar ina translaziun. Uschia dov'ins en tut las regions linguisticas da la Svizra per exempel il pled *sale* per inditgar ina *vendita*.

La translaziun da plets englais en l'atgna lingua n'è betg adina la meglra soluziun, savens datti ina gronda resistenza, cunzunt en champs spezialisads che resentan la translaziun proponida sco reproductiun sblatga u perfin artificizala dal term englais. Il success dals anglicissem è senza dubi er collià al maletg modern, dinamic ed efficaci ch'els transportan. Quai tanscha uschè lunsch che tscherts anglicissem han mo il sun englais, èn dentant spira creaziun da pajais betg anglofons (p.ex. *beamer* en tudestg, *lifting* en franzos u *pendrive* en talian). Ils equivalentes proponids, per il pli plets creads da nov (neologissem) en las linguas naziunalas, han magari fadia da sa far valair. Ils arguments per u cunter èn en emprima lingia emozional, u ch'in pled plascha u ch'el na plascha betg. L'acceptanza vegn cun la disa, per ch'in neologissem sa possia imponer en la lingua, sto il vegnir duvrà savens ed esser derasà vastamain.

Ins po constatar che blers anglicissem èn passagers, els naschan d'ina moda e vengnan mo in temp limità. Auters per cunter correspundan ad in vair basegn, cun quai che las linguas naziunalas na possedan betg u betg anc terms adequats per designar novas noziuns. Per che las linguas naziunalas restian dinamicas, ston ellas sa sviluppar ensemen cun ils basegns comunicativs da la societad.

## Il tractament dals anglicissem en las differentas linguas

Il tudestg integrescha anglicissem Il tudestg ha magari la reputaziun d'esser zunt spert ed avert envers ils anglicissem, la raschun saja la stretga vischinanza da las duas linguas germanas. Nagina da las duas supposiziuns na tutga dentant dal tutafatg la noda. D'ina vart deriva la gronda part dals plets emprestads da l'englais duvrads en tudestg oriundamain dal franzos mesaun u dal latin, da l'autra vart cuntegna l'ediziun dal 2013 dal Duden mo 3,5 pertschient anglicissem (var 20% dal stgazi da plets tudestg èn plets esters). E tenor la validaziun da Goethe – che la forza d'ina lingua na saja betg da refusar l'ester, mabain d'al integrar – fa il tudestg gist quai cun la gronda part dals anglicissem. Quai dat lura per exempel verbs sco *downloaden* (cun il particip *gedownloadet*) u furmas dal plural sco *Babys* (empè da *babies*). En Svizra tudestga vegn vitiers

in'ulteriura cumpontenta cun il dialect, ch'è sco lingua orala e currenta plitost avert envers ils anglicissem. Quai na vala dentant betg per tut ils champs da la vita en medema maniera: fitg savens cumparan anglicissem surtut en il «patua» da la cultura populara, da l'economia e da l'informatica.

## Il franzos tschertga alternativis

L'onn 1996 ha la Frantscha institui mesiras per enrictgar la lingua franzosa. L'intent era da crear novs terms che permettan da designar noziuns novas (derivantas il pli savens dals Stadis Unids), surtut en las domenas scientificas e technicas. Cumissius da terminologia a l'intern dals ministeris han l'incumbensa da tschertgar e da determinar substituziuns als terms englais. Il diever dals terms franzos novs è obligant per l'administraziun franzosa. Perquai datti en franzos bleras creaziuns novas ch'èn vegnidas integradas er en la lingua da mintgadi ed han remplazzà ils anglicissem (*logiciel* per *software*, *ordinateur* per *computer* etc.). En la lingua currenta per cunter circuleschan blers anglicissem (p.ex. *week-end*, *zoom*, *camping*, *switcher* etc.). En Svizra, nua che l'influenza dal tudestg è gronda, vegnan savens preferids ils anglicissem als equivalentes franzos bain etablids (*screening* per *mammographie*, *whistleblower* per *lanceur d'alerte*, *sale* per *soldes* etc.).

## Il talian sa proveda cun emprest

Il talian integrescha ils anglicissem senza far gronda opposiziun, a medem temp crescha dentant il quità per il stadi da sanadad da la lingua. Forsa è il talian simplamain ina lingua che sa plascha pauc u ch'è inclinada vers l'ester. La distanza emozionala envers l'atgna lingua po vegnir interpretada sco reacziun al purissem linguistic da l'epoca fascista; ils anglicissem èn dentant pli e pli frequents er en il Tessin ed en il talian da l'administraziun federala. Sin nivel lexical (vocabulary) para la prozentuala d'anglicissem en la lingua taliana d'esser stabila. Il talian dovra darar in'adattaziun (er sche las excepziuns na mancan betg; p.ex. *god*), el integrescha l'anglicissem sco tal (p.ex. *update*) u sco substrat bain visibel (p.ex. *buone prassi*). Ils emprest integrals, pli frequents en la lingua scritta, vegnan savens accompagnads d'ina decleraziun. L'influenza creschenta da l'englais sa mussa pli e pli er en la sintactica (p.ex. sco imitaziun da la posiziun da plets englaisa), en la midada da la significaziun da plets talians (p.ex. *applicare* per *presentare una candidatura*) e tar la creaziun da plets che sumeglian l'englais. En il Tessin èn ils anglicissem ils plets esters ils pli preschents en la lingua currenta, malgrà il contact cun il franzos ed il tudestg.

## Ils Rumantschs èn pragmatics

Il rumantsch grischun è vegni introduci sco lingua standardisada l'onn 1982. El è damai anc giuven ed ha ina curta tradiziun.

Cuntrari al purissem pli pregnant dals emprims onns, na preschiva l'instituziun da lingua actualmain naginas reglas normativas per tractar ils anglicissem. Ils Rumantschs e las Rumantschas han ina tenuta plitost pragmatica en quella dumonda ed èn pauc restrictivs, la resistenza cunter ils anglicissem n'è betg fitg gronda. La finamira principala è d'avair ina lingua bain chapibla. Quels ch'èn mintgamai responsabls per la nova terminologia decidan da cas a cas e proponan tut tenor ina substituziun dal term englais ([www.pledarigrond.ch](http://www.pledarigrond.ch)). La vischinanza cun il tudestg svizzer influenzescha il pensar e la tschantscha dals Rumantschs e fitg savens entra in anglicissem sur il dialect tudestg en il rumantsch.

Questa publicaziun cuntegna propostas rumantschas als anglicissem. Sch'il nov term rumantsch vegn acceptà ed er duvrà en la lingua da mintgadi u sche l'anglicissem va cun la plima vegn a mussar ses diever. I dat cas, nua che l'anglicissem è vegni remplazzà immediatamain (p.ex. *aissa*, *cutga* per *snowboard*), tals, nua ch'igl è gartegià d'introducìr in term rumantsch (p.ex. *posta elettronica*, *gasetta gratuita*). Plinavant datti cas, nua che l'anglicissem ed in term rumantsch vegnan duvrads omadus (p.ex. *feedback/resun*, *handy/telefonin*) e finalmain existan er cas, nua ch'i na dat (anc) nagina substituziun per il term englais, la scripziun è dentant vegnida adattada a quella dal rumantsch (p.ex. *mobing*, *hobi*).

## Ils Englais èn in zichel irritads

Ils Englais n'èn betg enconuscents sco linguists talentads; blers n'èn insumma betg conscients da la gronda quantitat da plets esters en lur atgna lingua. I dat la famosa explicaziun da George W. Bush ch'ha ditg ch'i il problem cun ils Franzos saja quel ch'els na possedian betg in agen pled per *entrepreneur*...

Plets esters vegnan absorbads da la lingua englaisa senza scrupels: la pronunzia vegn simplamain adattada a l'englais (*latte* vegn p.ex. il pli duvrà per *caffè latte* – savens pronunzià cun lungs vocals englais: [la:te]), il plural vegn furmà cun agiunscher in -s (*rucksacks*), verbs esters vegnan tractads cun la flexiun grammaticala englaisa (*manoeuvre*). Purists linguistics han empruvà antruras da remplazzar plets d'origin latin u grec tras equivalentes d'origin germanic: senza il minim success. Appels da reformar l'ortografia n'han er betg cuntanschi resultats concret.

La pitschna minoritad d'Englais conscienta da la quantitat d'anglicissem ch'existan en autras linguas è confruntada cun diversas dumondas dispaivlas. Ils translatur ston per exempel translatur ils pseudoanglicissem en bun englais, quai che n'è betg simpel: clients mettan magari en dumonda il diever da *projector* per *beamer*, u ch'in pseudoanglicissem po esser grev da distinguer d'in term da standard (p.ex. *sponsoring* empè da *sponsorship*). Inqual Englais vegn a sa snuir, sche personas betg englaisas prendan in'expressiun englaisa en bucca e la dovran in'correctamain (p.ex. *happy end* empè da *happy ending*) u sch'ellas dovran ina frasa banala sco *last but not least* per dar in tif impurtant a lur discurs.

La popularitad da l'englais sco lingua franca e quella dals plets emprestads da l'englais na paran dentant betg da tschesar. Ed entant ch'autras linguas combatan cun dumondas davart ils anglicissem, han ils Englais bella vita.

## La preschentschiun:

Chanzlia federala. (Secziun Terminologia). 100 anglicissem. Berna 2015.

## Dapli infurmaziuns:

[chatta.ch/?hiid=3762](http://chatta.ch/?hiid=3762)  
[www.chatta.ch](http://www.chatta.ch)

Sport und Freizeit Sports et loisirs Sport e tempo libero Sport e temp liber Sport and leisure		Handel und Konsum Commerce et consommation Commercio e consumo Commerzi e consum Commerce and consumer affairs	
Informatik und soziale Netzwerke Informatique et réseaux sociaux Informatica e media social Informatica e raits socialas IT and social media		Medien, Kommunikation, Unterhaltung Presse, communication, spectacle Informazione, comunicazione, spettacolo Medias, comunicaziun, divertiment Media, Communication and entertainment	
Politisches Leben Vie de la cité, politique Vita politica Vita politica Politics		Wirtschaft und Berufsleben Entreprise et vie professionnelle Economia e vita professionale Economia e vita professional Business and professional life	
Reisen und Verkehrsmittel Voyages et transports Viaggi e trasporti Viadis e transports Travel and transport		Alltag Vie pratique Vita quotidiana Vita da mintgadi Everyday life	
Gesellschaft Société Società Societad Society		Gesundheit und Schönheit Santé et beauté Salute e bellezza Sanadad e bellezza Health and beauty	

Ils champs tematics che vegnan tractads.